

四庫全書

子部

欽定四庫全書

冊府元龜卷四百八十三 宋 王欽若等 撰

邦計部

總序

天地以生物為大德聖人以富有為大業治國務本體乎阜養之和聚人以財貴乎歛施之節食貨之利不亦博乎攸司之設其來久矣少昊氏以九扈為九農正隨其宜以教人事此其始也帝舜命棄播是百穀以為稼

官命伯益奏庶艱食實山虞之官帝禹代父鯀為司空平水土之官以有天下夏商之制方冊罕紀周文王之在岐用平水土之法為治人之道建司馬之法以為田制武王成王紹興統繕周公行政厥職大備天官太宰之屬大夫下大夫為王治藏之府長若司農矣掌以九貢九賦九功之貳以受其貨賄之入領其貨于受藏之府頒其賄于受用之府秦漢以來不置大府然其職在司農少府至梁天監七年始置大府卿又有玉府掌王之金玉玩好兵器凡良貨賄之藏又內府掌受

九貢九賦九功之貨賄良兵良器以待邦之用又外府  
掌邦布之入出以貢百物而待邦之用又有司會中大  
夫二人下大夫四人主天下大計計官之長若尚書矣掌以九貢之法

致邦國之財用以九賦之法令田野之財用以九功之  
法令民職之財用以九式之法均節邦之財用掌國之  
官府郊野縣都之百物財用凡在書契版圖者之貳以  
逆羣吏之治而聽其會計又司書掌邦之六典八法八則九  
職九正九事邦中之版土地之圖以周知出入百物以

叙其財受其幣使入於職幣又職內掌邦之賦入辨其財用之物而執其總以貳官府都鄙之財入之數以逆邦國之賦用又職歲掌邦之賦出以貳官府都鄙之財出賜之數以待會而攷之又職幣掌式法以歛官府都鄙與凡用邦財者之幣振掌事者之餘財又地官大司徒之職卿一人掌建邦之土地之圖與民之數若戶部尚書也  
一云案戶部之職與地官之任雖亦頗同若微其沿襲則戶部合出於度支度支在算計之官算計之任本出於天官之司會矣小司徒之職掌建邦之教法以稽國中及四

郊都鄙之夫家九比之數又鄉師之職各掌其所治鄉之教而聽其治以國比之法以時稽其夫家衆寡辨其老幼貴賤廢疾馬牛之物辨其可任者與其施舍者掌其戒令糾禁聽其獄訟又鄉大夫之職各掌其鄉之政教禁令以歲時登其夫家之衆寡辨其可任者又州長各掌其州之教治政令之法又黨正各掌其黨之政令教治又族師各掌其族之戒令政事又地官載師掌任土之法以物地事授地職而待其政令又閭師掌國

中及四郊之人民六畜之數以任其力以待其政令以時徵其賦又縣師掌邦國都鄙稍甸郊旅之地域而辨其夫家人民田菜之數及其六畜車輦之稽三年大比則攷羣吏而詔廢置又均人掌均地政均地守均地職均人民牛馬車輶之力政又司市掌市之治教政刑量度禁令又質人掌城市之貨賄人民牛馬兵器珍異又廛人掌歛布綏布總布質布罰布廛布而入于泉府又胥師各掌其次之政令而平其貨賄憲刑禁焉又賈師

各掌其次之貨賄之治辨其物而均平之展其成而奠  
其賈然後令市又司虢掌憲市之禁其鬪囂者與其虢  
亂者又泉府掌以市之征布歛布之不售貨之滯於民  
用者司稽掌巡市而察其犯禁者又司閼掌國貨之節  
以聯門市司貨賄之出入者又遂人掌邦之野以土地  
之圖經田野造縣鄙形體之法又遂師各掌其遂之政  
令戒禁以時登其夫家之衆寡六畜車輦辨其施舍與  
其可任者又遂大夫各掌其遂之政令以歲時稽其夫

家之衆寡六畜田野辨其可任者又縣正各掌其縣之政令徵比以領田里以分職事掌其治訟趨其稼事而賞罰之又鄙師各掌其鄙之政令又鄴長各掌其鄴之政令以時校正登其夫家比其衆寡又里宰掌比其邑之衆寡與其六畜兵器治其政令又鄰長掌相糾相受又旅師掌聚野之勑粟屋粟間粟而用之以質劑致民平領興其積施其惠散其利而均其政令又稍人掌令丘乘之政令又委人掌斂野之賦斂薪芻土均掌土地之政

以均地守以均地貢又山虞掌山林之政令物為之厲而為之守禁又川衡掌巡川澤之禁令而平其守又澤虞掌國澤之政令為之厲禁使其地之人守其財物以時入于王府領其餘于萬民又廩人掌九穀之數以待國之匪頒賙賜稍食又司稼掌巡邦野之稼而辨穜稑之種周知其名與其所宜地以為法又春人掌共米物槁人掌共内外朝冗食自天官太宰以下咸有大夫士府史胥徒以屬焉諸侯之國則齊用管仲制國以寓軍

政及謹正鹽筴鐵官之數越王勾踐用范蠡計然之術以勝吳魏文侯相李悝作盡地力之教平羅之法秦孝公任商鞅廢井田制阡陌至始皇并天下有治粟內史掌穀貨有兩丞少府掌山海地澤之稅以給其養屬官有太官湯官導官若盧考工室東織西織東園匠令丞胞人都水均官長丞又上林十八池監尚方御府官令皆主貨食工作之事漢高祖封張蒼為北平侯遷為計相能計故號計相一月更以列侯為主計四歲以列使典授郡國傳書又云以

其所主因以為官號與計  
相同時所卒立非久施也

是時蕭何為相國而蒼乃自

秦時為柱下史時習天下圖書計籍蒼又善用算律歷  
故令蒼以列侯居相府領主郡國上計又有尚書郎四  
人內一人主戶口墾田一人主財帛委輸景帝後元年  
更名治粟內史為大農令丞亦二人或謂之中丞武帝  
太初元年更大農令為大司農秩中二千石屬官有大  
倉均輸平準都內籍田五令丞幹官鐵市兩長丞郡國  
諸倉農監都水六十五官長丞又有搜粟都尉武帝軍

官不嘗置又都水鐵官兩長丞屬京兆尹又左都水鐵官及長安四市長丞皆屬左馮翊右都水鐵官屬右扶風孝武帝大興征伐孔僅為大農上鹽鐵丞及東郭咸陽奏置小鐵官使屬在所縣使僅及咸陽乘傳行天下鹽鐵作官附除故鹽鐵家富者為吏初大農幹鹽鐵官布多置水衡欲以主鹽鐵及楊可告緝上林財物衆乃令水衡主上林上林既充滿乃分緝錢諸官而水衡少府大僕大農各置官徃徃即郡縣比沒入田田之其沒

入奴婢分諸苑養狗馬禽獸及與諸官益雜置多

謂雜置掌

衆官員事耳後桑弘羊為治粟都尉領大農請置大農部丞

數十人分部主郡國各往往置均輸鹽鐵官其水衡都

尉掌上林苑有五丞屬官有上林均輸御羞禁圃楫櫂

鍾官技巧六廡辨銅九官令丞又有衡官水司空都水

農倉甘泉上林都水七官長丞上林有八丞十二尉均

輸四丞御羞兩丞都水三丞禁圃兩尉甘泉上林四丞

元帝時鹽鐵官及比假田官常平倉其後用度不足獨

復鹽鐵官成帝建始二年省技巧六廄官又置尚書五人其三曰民曹典膳治功作鹽池苑囿之事河平元年省東織更名西織為織室哀帝初少府省樂府平帝又置司農部丞十三人入部一州勸農桑矣東漢承前制大司農卿一人中二千石掌諸錢穀金帛諸貨幣郡國四時上月旦見錢穀簿其逋未畢各具別之邊郡諸官請調度者皆為報給損多益寡取相給足丞一人比千石部丞一人六百石部丞主帑藏屬官有大倉令一人主

受郡國轉漕穀丞一人平準令一人掌知物賈主練染  
作采色丞一人導官令一人主春御米及作乾糒丞一  
人廩犧令一人掌祭祀犧牲鴈鷺之屬丞一人雒陽市  
長一人丞一人滎陽教倉官中興皆屬河南尹餘均輸  
等皆省初郡國鹽官鐵官並屬大司農中興皆屬郡縣  
少府卿一人中二千石掌中服御諸物衣服寶貨珍膳  
之屬少者小也故稱少府王者以租賦為公用山澤陂  
池之稅以供王之私用丞一人比千石屬官有太官令

掌御飲食守宮令一人主御紙筆墨及尚書財用諸物  
上林苑令一人及鴻德苑令主苑中禽獸頗有民居皆  
主之濯龍監直里監各一人並主雒陽園中藏府令一  
人掌中幣帛金銀諸貨物尚方令一人掌上方工作御  
刀劍諸好器物及寶玉作器魏大司農因漢之制又置  
典農中郎將主屯田典農中郎典農校尉所主如中郎  
又置度支尚書掌軍國大計又有度支金部虞曹比部  
庫部農部水部倉部民曹等郎皆主食貨之事蜀吳多

如舊制而蜀先主定益州置鹽府校尉較鹽鐵之利屬  
官有典曹都尉晉受命罷農部置比部金部倉部度支  
左民右民虞曹屯田起部水部等曹郎後又置運漕及  
渡江無左民屯田運曹虞曹又省起部水部曹大司農  
統太倉籍田道官三令襄國都水長東西南北護曹掾及  
渡江省并都水孝武復置焉少府統材官校尉中左右  
三尚方中黃左右藏左校甄官平準奚官等令左校坊  
鄴中黃左右藏油官等丞及渡江省并丹陽尹孝武復

置焉宋有大司農一人丞一人掌九穀六畜之供膳羞者屬官有太倉簿官籍田等令丞又少府一人丞一人掌服御之物領左右尚方御府東冶平準等令丞又度支尚書領度支金部倉部起部四曹又有左民尚書自此以降民曹或為左民或為右戶又有比部水部郎中其虞部郎中省都官尚書領水部焉南齊大司農水官屬並如晉制其少府又加領左右尚鋤署梁高祖天監七年以大司農為司農卿班第十一是為春卿梁初猶依宋齊皆無卿名

至是司農卿位視散騎常侍主農功倉廩統太倉藥官增馬

籍田上林令又管樂遊北苑丞左右中部三倉丞莢庫  
箬庫丞湖西諸屯主九年又置勸農謁者親殿中御史  
又有司農主簿一人初置大府卿掌金部府帑統右藏  
令上庫丞掌大倉南北市令關津亦屬焉又以少府為  
夏卿統材官將軍左右中尚方甄官平水南塘邸稅庫  
東西治中黃細作炭庫紙漆等署令丞屬焉又置左右  
尚書並掌戶籍兼知工官之事其戶部度支金部倉部

屯田虞部並有侍郎郎中陳並因之其司農卿又有主簿其戶部尚書領屯田後魏初大司農第二品孝文太和二十年改為第三品少卿第三品亦改為正第四品上丞第五品中改為第七品下其主簿省之又改少府為大府卿品第三後改少府復為太府其尚書省則祠部尚書省之屬有虞曹掌地圖山川遠近園圃田獵穀膳雜味等事屯田掌籍田諸州屯田等事起部郎掌諸興造工匠等事都官尚書之屬有比部掌勾檢等事水

部掌舟船津梁公私水事膳部掌侍官百司禮食餚饌等事度支尚書之屬統度支掌計令凡軍國損益及軍役糧廩事倉部掌諸倉帳出入事左戶掌天下計帳戶籍等事右戶掌天下公私田宅租調等事金部掌權衡量度內外諸庫藏文帳等事庫部掌戎仗器用所須事北齊因之司農寺省卿少卿各一人掌倉市薪米園池果實復置主簿其左右三尚方司染諸治及細作甄官等署並隸太府後周司農上士一人掌三農九穀稼穡

之政令屬大司徒大府有中大夫掌貢賦貨賄以供國用屬大冢宰又有計部大夫其戶部度支金部倉部工部屯田虞部水部咸準六官各以其差次屬焉隋初司農卿與北齊同太府寺卿一人統左藏左右內三尚方司染右藏掌治甄官等署各置令丞煬帝分太府等置少府監管三尚方及司染掌治等署而太府寺管左右藏及兩市平準等署焉少府置監一人少監一人丞二人統左尚內司織司染鎧甲弓弩掌治等署其後又

改監為令少監為少令併司織司染為織染令鎧甲弓  
弩二署司農卿但統上林太倉鈎盾道官四署罷典農  
上林二署以平準令隸司農寺掌苑囿薪芻炭市易度  
支加司農少卿二人又尚書省兵部尚書之屬有度支戶部  
都官尚書之屬有工部度支尚書之屬有度支戶部金  
部倉部工部尚書之屬有工部屯田虞部水部等侍郎  
並分掌兵仗勾檢出納國計戶口金錢廩庾工役官田  
山澤舟船之事焉唐制司農卿之職掌邦國倉儲委積

之事總上林太倉鈎盾菴官四署與諸監之官屬謹其出納而修其職務少卿為之貳少卿二人丞六人屬官有上林署令二人大倉署令三人菴官署令二人太原水豐倉監一人龍門等諸倉每監一人司竹監一人湯泉湯監一人京都苑總監監各一人京都苑四面監各一人諸屯監監一人也凡城宮總監監一人太府寺卿之職掌邦國賦貸之事總京都四市平准左右藏常平八署之官屬舉其綱目修其職務少卿二人丞四人兩

京儲市署令各一人平准署令二人左藏署令三人右  
藏署令二人常平署令一人少府監之職掌供百工技  
巧之事總中尚左尚右尚織染掌治五署之官屬庀其  
工徒謹其繕作少監為之貳少監二人丞四人中尚署  
令一人左尚署令一人右尚署令一人織染署令一人  
掌治署諸治監每治監一人北都軍器監一人甲坊署  
令一人弩坊署令一人諸鑄錢監各一人互市監每市  
監一人咸有丞副主簿錄事府史之徒以屬焉戶部尚

書侍郎之職掌天下戶口井田之政令其屬曰戶部度支金部倉部戶部郎中員外郎各二人掌領天下州縣戶口之事分十道以總之度支郎中員外郎各一人掌支度國用租賦多少之數金部郎中員外郎各一人掌庫藏出納之節金寶財貨之用倉部郎中員外郎各一人掌國之倉庾受納賦稅出給祿廩之事刑部尚書侍郎之屬曰比部郎中員外各一人掌勾諸司百僚俸料調歛逋欠因知內外之經費工部尚書侍郎之職掌天

下百工屯田山澤之政令其屬曰工部屯田虞部水部  
工部郎中員外郎各一人掌經營興造之衆務屯田郎  
中員外郎各一人掌天下屯田之政令虞部郎中員外  
郎各一人掌天下虞衡山澤之事水部郎中員外郎各  
一人掌天下川瀆陂池之政令咸有令史主事等員以  
屬焉其官名公革並具卿監臺省門其後財貨之任多專置使以主之  
不獨歸於臺閣睿宗景雲二年以蒲州刺史充關內鹽  
池使鹽鐵之有使自此始也其後朔方節度常帶鹽鐵使明皇先天

二年始以陝州刺史李傑充陝州水陸運使漕運之有使自此始也是年又以幽州刺史強循充鹽池使即鹽州池也開元二年又以河南尹李傑充水運使大興漕事明年畢構為河南尹不帶水陸運使又十一年以殿中侍御史宇文融勾當租庸地稅使十二年融遷御史中丞充諸色案年戶口使十八年拜戶部侍郎裴耀卿為江淮轉運使仍以鄭州刺史崔希逸河南少尹蕭景為之副轉運鹽鐵之有副使自此始也二十一年以侍

中裴耀卿充江南淮南轉運使明年九月蕭景除太府  
少卿知度支事充江淮處置轉運使二十三年以太府  
少卿李元祐知度支使二十五年以監察御史羅文信  
充諸道鑄錢使是年又令諸屯隸司農寺明年以侍御  
史楊春矜充太府出納使天寶二年陝郡太守韋堅加  
兼知勾當租庸使又加兼勾當緣河及江淮轉運處置使  
三載以御史中丞楊春矜充鑄錢使又以李齊物除江  
南尹復帶水陸運使四載以戶部郎中王鉛加勾當戶

口色役使又以殿中侍御史楊釗充司農出納錢物使  
又充水陸轉運使五載詔以司農錢穀是司其官人等  
並不在差使限又以侍御史楊釗充木炭使六載以戶  
部侍郎楊脊矜又充兩京含嘉倉出納使諸道鑄錢使  
仍加諸郡租庸使七載又以給事中楊釗兼御史中丞  
專判度支八載廢帳坊為戶部員外廳次北為戶部郎  
中廳皆至宏麗又於省街東取都水監地以諸州籍帳  
錢造考堂制度又過於省中移都水監於省西北割右

武衛園地置之

乾元以後毀折並盡今為戶部園

十載度支使楊國忠

奏請自勾當陝郡水陸運加國忠陝郡水陸運使太守  
崔無詖遂不帶使名十二載又詔陝運使宜令崔無詖  
充使楊國忠充都使勾當肅宗至德元載以監察御史  
第五琦充江淮租庸使乾元元年以度支郎中第五琦  
又充河南五道度支使兼諸道鹽鐵使是年又充兩京  
司農太府出納使及充諸色轉運使是年升司農寺中  
署為上署二年十二月以兵部侍郎同中書門下平章

事呂禋充勾當度支使并轉運使上元元年戶部侍郎  
勾當度支使劉晏又充勾當鑄錢鹽鐵等使又以殿中  
監李輔國加京鑄錢使元年建子月以戶部侍郎勾當  
度支使元載充江淮轉運及鹽鐵使寶應元年以侍御  
史穆寧為河南道轉運使租庸鹽鐵使又以通州刺史劉  
晏為戶部侍郎京兆尹勾當度支并轉運使兼充勾當  
鑄錢使度支鹽鐵兼漕運自晏始也廣德元年代宗居  
陝御史中丞裴諝為河東道租庸鹽鐵等使二年第五

琦充諸道鹽鐵鑄錢轉運使專判度支又以簡核戶部  
尚書劉晏為河南及江淮以來轉運使其年六月禮部  
尚書兼御史大夫李峴充江南西道勾當鑄錢使永泰  
元年正月劉晏充東都淮南浙江東西湖南山南東道  
轉運鹽鐵鑄錢等使第五琦充京畿關內河東劍南山  
南西道鑄錢轉運鹽鐵等使是年閏十月京兆尹黎翰  
充木炭使自後京兆尹常帶此使二年以劉晏為東道轉運常平  
鑄錢鹽鐵使第五琦為關內河南劍南三川轉運常平

鑄錢鹽鐵等使大歷四年以吏部尚書兼御史大夫劉晏充東都河南江淮山南東道轉運鹽鐵鑄錢使五年停諸鐵錢監監以所在州府都督刺史判之副監以上佐判之是年停木炭使又詔停關內河東三川轉運常平鹽鐵使自此劉晏與戶部侍郎韓滉分領關內河東山南劍南租庸青苗使至十四年天下財賦皆以晏掌之德宗建中元年言事者稱轉運之職可罷乃罷劉晏為右僕射天下錢穀皆歸金倉兩部委中書門下簡兩

司郎官准格式條理于時天下錢穀歸尚書省本司職事久廢無復綱紀徒收其名而莫總其任國用出入無所統之是年三月以戶部侍郎韓泗判度支金部郎中杜祐權勾當江淮水陸運使行劉晏韓滉舊制十一月又以杜祐兼御史中丞江淮水陸運使十二月停江淮水陸運使轉運事委度支處置三年八月分置汴東西水陸運兩稅鹽鐵使建中三年正月戶部郎判度支杜祐奏天寶以前戶部事繁所以郎中員外各二人判署自兵興以後戶部事簡度支事繁度支郎中員外各一人請廻轂戶部郎中員外各一人

分判度支案待天下  
兵革息却歸本曹

十二月又分置汴東汴西水陸運

鹽鐵租庸使汴東以包佶為之汴西以崔縱為之貞元  
元年以浙西節度使檢校左僕射平章事韓滉為江淮  
轉運使又加諸道轉運鹽鐵使藩鎮領諸道鹽鐵始於  
此也二年諸道水陸運使及度支巡院江淮轉運使等  
並停五年以中書侍郎同中書門下平章事竇叅充鹽  
鐵度支使諸道轉運等使八年以戶部尚書班宏加轉  
判度支諸道鹽鐵使又詔東南兩稅財賦自河南江淮

嶺南東道至渭橋以戶部侍郎張滂主之河東劍南山  
南西道以戶部尚書度支使班宏主之

于時宏滂互有  
所短命宰相趙

景陸贊以其事上聞由是遵大歷故事如劉晏韓滉所分焉

其年七月司農少卿裴

延齡加權判度支九年張滂奏立稅茶法郡國有茶山

及商賈以茶為利者委院司分置諸場茶之有稅自滂

始也自後裴延齡專判度支度支與鹽鐵益殊塗而治

矣十年潤州刺史王緯代張滂為鹽鐵使治于京口俄

兼諸道轉運鹽鐵使十一年戶部侍郎裴延齡充京西

木炭採運使十二年戶部尚書裴延齡判度支又以倉  
部郎中判度支案蘇弁除度支郎中兼御史中丞副知  
度支事立位於正郎之首副知之號自弁始也

度支自貞元以

前他官未判者甚衆自後多以尚書侍郎主之別官兼  
者希矣故事度支案郎中判入員外判出侍郎總統案  
而已官銜不言專判度支開元以後時事多故遂有他  
官來判者或尚書侍郎專判乃曰度支使或曰判度支  
使或曰知度支或曰知度支事或曰  
勾當度支使雖名目不同其事一也

是月停木炭使十

三年以陝虢觀察使于頤兼陝州水陸運使十六年置

榷鹽使先是兩池鹽務隸度支及職使諸道巡院使弁

以金部郎中主安邑解州兩池弁主池務恥同諸院遂奏署使

榷鹽使一員推官一員巡官十員安邑院官一員解院縣官一員胥吏防池官健及池戶若干人

其後杜祐兼領鹽鐵度支以度支既稱使所管不合更有使名遂與東渭橋使同奏罷之

十九年

太倉奏請依六典置太倉令二員丞六員監事十員支

計官驅使官三人典六人府使六人又烏池在鹽州置

榷稅使一員推官兩員巡官兩員胥吏一百三十人防

池官健及池戶四百四十人順宗即位有司重奏鹽法

以杜祐判鹽鐵轉運使治於揚州永貞元年以司空平

章事杜祐再兼諸道轉運使又兼諸道鹽鐵使憲宗元

和元年以兵部侍郎李巽充諸道轉運鹽鐵使二年以

李巽代杜祐判鹽鐵轉運使

先是李錡判使天下酷漕  
運由其操剖專事貢獻守

其寵渥中朝秉事者悉以利之鹽鐵之利積於私室而  
國用日耗巽既為使大正其事其堰埭先隸浙西觀察  
使者悉歸之因循權置者盡罷之增置河陰教倉置桂  
陽監鑄平陽銅山為錢又奏江淮河南陝西充鄆嶺南  
鹽法院去年收鹽價緡錢七百二十七萬比舊法張其  
估千七百八十餘萬非實數也今請以其數除為煮鹽  
之外付度支收其數鹽鐵使

三年七月判度支裴均以

兩池職轉繁劇後以留後為權鹽使八月司農少卿崔

鄆奏停倉丞一員監事二員十月度支使鄭元奏當司  
判案郎中官先有六員今請留四員為定四年加度支  
判案郎中一員又詔其鹽鐵使楊子留後宜兼充淮南  
浙西浙東宣歙福建等道兩稅使其江陵留使宜兼充  
荆南山南東道鄂岳江西湖南嶺南等道兩稅使度支  
山南西道分巡院官兼充劍南東西川及山南西道兩  
稅使其陝內五監舊屬鹽鐵使宜割屬度支使便委山  
南西道兩稅使兼知糴貨峽內鹽鐵屬度支使自此始

也五年誅李師道收復淄青十二州未定戶籍詔命諫議大夫王彥威充十州勘定兩稅使又詔停河南水陸運使十四年鄭青兗三州各置鹽鐵院又改河北稅鹽使為榷鹽使穆宗長慶三年十二月度支奏判案郎中比有六人近減置四員請更置郎官一員判案以主客員外郎自行簡充從之四年詔東都江陵鹽鐵轉運留後並改為知院官從鹽鐵使王涯請也敬宗初王播復以鹽鐵使為揚州節度使又云寶歷元年正月王播為淮南節度又充諸道轉運使文宗即位

王播入觀以宰相判鹽鐵轉運其後王涯復判二使太  
和二年詔潼關以東度支分巡院宜併入鹽鐵江淮河  
陰留後院及王涯以事誅而令狐楚以尚書右僕射主  
茶法充諸道轉運鹽鐵使以是年茶法復貞元之制開  
成二年勅鹽鐵戶部度支三使下鹽院皆郎官御史為  
之使雖更改院官不得移替三年諸道轉運鹽鐵使戶  
部尚書楊嗣復以本官平章事主茶法多革錢穀鹽院  
之陳事至宣宗大中壬申凡一十五年多任以元臣以集其務崔珙自刑部尚書拜杜悰以淮南節度

領之既而皆踐公台薛元賞李執方盧洪正馬植敬晦五人於九年之中相踵理之植自是亦居相位

五年

九月勅稅茶法起來年却付鹽鐵使收管武宗會昌元年二月以南省六曹戶部度支兩司尚書侍郎多奏請諸行郎官判錢穀文案遂令本司郎吏束手閒居至於廳事皆他官所處自今以後其度支戶部錢穀文案本行郎官分判不在更請諸行郎官限仍委尚書侍郎同行郎官便自於行內選擇差判其戶部一行郎官仍委中書門下皆選擇與公務相當除授如本行員數欠少

亦任於諸行稍間司中選才質資序相當者奏請轉授  
五年九月勅置備邊庫收納度支戶部鹽鐵三司錢物  
宣宗大中三年十月詔改備邊庫為延資庫內之度支  
郎中判四年因收復河隴詔灑池鹽令度支收管仍以  
靈州分巡院官專勾當置榷稅使一員推官兩員巡官  
兩員胥吏三十九人防池官健  
及池戶二百六十五人是年羌項羌叛擾饋運不通  
供軍使請榷市河東白池鹽共食其白池屬河東節  
度使不繫度支胡雄池在豐州界隸河東供軍使每年  
採鹽約一萬四千餘石供振武天德兩軍及營田水運  
官健又詔以宰相判延資庫於是白敏中崔鉉相繼判其

三司率送五年二月以刑部侍郎裴休為鹽鐵轉運使俄又

立稅茶之法僖宗乾符四年六月以宣歙觀察使高駢為潤州刺史諸道轉運鹽鐵使六年移節淮南領使如故中和元年車駕出狩興元府以兵部侍郎蕭遘中書

侍郎平章事韋昭度掌判鹽鐵

及命侍中王鍔為行營都統發出諸道之兵收復京城慮調度不時

乃以昭度兼供運使光啓二年以刑部尚書孔緯充諸

道轉運鹽鐵使是時所在征鎮自擅兵賦皆不上供歲

時但貢奉而已由是江淮轉運路絕國命所能判者唯

河西山南劖南嶺南西道洎中官田令孜自蜀中扈從  
召募新軍號左右神策共四十四部並南衙官屬僅萬  
餘三司轉運無調發之所舊日兩池榷鹽稅課鹽鐵使  
時置鹽官以總其事自亂離之後河東節度使王重榮  
兼領榷務至是令孜以軍食闕供乃舉廣明前故事請  
以兩池榷務歸之鹽鐵詔下重榮上章論訴竟不能奪  
梁太祖開平元年四月置建昌院以博王友文判院事  
太祖在藩時四鎮所管兵車賦稅諸色課利按舊部籍

而主之其年五月中書門下奉請以判建昌院事為建  
昌宮使仍以東京太祖在龍舊宅為宮二年以侍中韓  
建判建昌宮事又以尚書兵部李皎為建昌宮副使三  
年九月以門下侍郎平章事薛貽矩兼延資庫使判建  
昌宮事乾化二年六月廢建昌宮以河南尹魏王張宗  
奭為國計使凡天下金穀兵戎舊隸建昌宮者悉主之  
後唐莊宗同光元年十一月以左監門衛將軍判內省  
寺李紹宏兼內勾管天下錢穀簿書悉委裁遣自是州

縣供帳煩費議者非之二年詔鹽鐵度支戶部三司凡  
關錢物並委租庸使管轄四年以吏部尚書李琦為國  
計使自後廢其名額不置明宗天成元年詔廢租庸院依  
舊為鹽鐵戶部度支三司委宰臣一人專判長興元年  
以許州節度使張延明行工部尚書充三司使班右宣  
徽之下三司置使自延明始也初延明自許州入再掌  
國計白於樞密使請置三司使召宣中書議其事宰臣  
以舊制覆奏授延明特進工部尚書充諸道鹽鐵轉運

等使兼判戶部度支事從舊制也明宗不從終以三司使為名此並唐室已後諸使掌錢穀之任者焉夫主計之重治本攸繫歷代而下莫不決擇賢彥資其經畧故有深明國體周知地利究消息盈虛之數而取之有時辨耗登聚散之宜而用之有節必也平其輕重析其毫杪無與備預用成幹濟以茲荷寵無忝厥職其有掊克以斂怨貪墨而徇私締結黨與矯誣縣官因而速尤誠取衆棄若乃敦惠養之道下蠲除之令仰賴王者之

澤則非臣下所專以時次之用明厥旨凡邦計部三十

九門

選任

材畧

褒寵

選任

周以太宰節財用漢以丞相主國計所以總天下之要會權歲杪之出入邦本攸重圖任斯難在乎器識精通機術周敏務持久之要道明兼濟之大畧經常而不闕歛下而無刻俾賄貨通流用度均贍斯為任職也是故

選受之際慎揀斯至或以其義更煩劇博習書數平可以操心粹細可以折秋毫或以其善商功利深識治體著於行事形於論議故得時望充塞僉謀載洽應疇次之命分內外之務然後盤結是解鐵乃益精無忝於厥服者矣

漢張蒼高帝以代相遷為計相以能計故號曰計相一說專主計籍故號計相一月更以列為主計去計相之名更號主計是時蕭何為相國蒼乃自秦時為柱下御史明習天下圖書計籍又善用筭

律歷故令蒼以列侯居相府領主郡國上計

東郭咸陽孔僅武帝時為大農丞

姓東郭名咸  
字孔僅

領鹽鐵事而

桑弘羊貴幸咸陽齊之大鬻鹽

鬻古字

僅南陽大治皆置產累

千金故鄭當時進言之弘羊雒陽賈人子以心計年十

三侍中故三人言利事析秋毫矣僅使天下鑄作器三

年中至大司農列九卿而弘羊為大司農中丞管諸會

計事後為治粟都尉領大農僅幹天下鹽鐵

幹本音  
管亦作

幹

趙過能為代田一晦三畊

畊音工大切或作畎壟也

歲代處故曰代

田

代易也

古法也武帝末年悔征伐之事乃封丞相為富

民侯

沛縣也欲百姓之殷實故取其嘉名也

下詔曰方今之務在於力農

以趙過為搜粟都尉

耿壽昌宣帝時以善為筭能商功利得幸於上

商度為也

大司農中丞

魏任峻為騎都尉太祖每征伐峻嘗居守給軍是時歲饑旱軍食不足羽林監穎川棗祗建置屯田太祖以峻

為典農中郎將數年中所在積粟倉廩皆滿國中之饑  
起於棗祗而成於峻也

晉安平王孚司馬懿之弟也初仕魏為清河太守魏文  
帝置度支尚書專掌軍國支計朝議以征討未息動須  
節量及明帝嗣位欲用孚問左右曰有兄風不答云似  
兄天子曰吾得司馬懿二人復何憂哉轉為度支尚書  
張華字茂先武帝潛與羊祜謀伐吳而羣臣多以為不  
可唯華贊成其計及將大舉以華為度支尚書乃量計

運漕決定廟筭

杜預為秦州刺史領東羌校尉石鑒時為安西將軍奏  
預乏軍興遣御史檻車徵詣廷尉以預尚公主八議以  
侯贖論會匈奴帥劉猛舉兵反武帝詔預以散侯定計  
省閭俄拜度支尚書又坐免官以侯兼本職數年復拜  
度支尚書

後周寇雋初仕後魏孝明為左將軍孝昌中朝議以國  
用不足乃置鹽池都將秩比上都前後居職者多有侵

隱乃以雋為之

唐第五琦天寶末以北海郡錄事參軍奏事至蜀中得謁見玄宗因奏言方今之急在兵兵之強弱在賦賦之所出江淮居多若假臣職任使濟軍須臣能使賞給之資不勞聖慮玄宗大喜即日拜監察御史勾當江淮租庸使尋遷殿中侍御史肅宗乾元元年加江南等五道度支使促辦應卒事無違闕累遷度支郎中戶部侍郎兼御史中丞專判度支領河南等道度支都勾當轉運

租庸鹽鐵鑄錢司農太府出納山南東西江西淮南館  
驛等使二年以本司同中書門下平章事尋貶忠州刺  
史入為太子賓客京兆尹代宗廣德還琦專度支永泰  
二年充京畿關內河東劍南山南西道轉運常平鑄錢  
鹽鐵等使前後領賦十餘年

劉晏肅宗上元初為京兆尹戶部侍郎判度支號為稱  
職無何為酷吏敬羽所構貶通州刺史寶應元年自通  
州召至復為戶部侍郎兼御史大夫京兆尹充度支轉

運鹽鐵諸道鑄錢等使二年遷吏部尚書平章事代宗  
廣德初罷相為太子賓客諸道轉運使尋加御史大夫  
充東都河南江淮轉運使永泰二年加東都畿內河南  
淮南江南東西湖南荆南山南東道轉運常平鑄錢鹽  
鐵轉運等使

元載自洪州刺史除度支郎中載智性敏悟善奏對肅  
宗嘉之委以國計俾充使江淮都領漕輓之任尋加御  
史中丞數月徵入遷戶部侍郎度支使並諸道轉運使

穆寧代宗寶應初轉侍御史為河南轉運租庸鹽鐵等使明年遷戶部員外郎無幾加兼御史中丞為河南江淮轉運使廣德初遷庫部郎中是時河南不通漕輓由漢沔自商山達京師選鎮夏口者代宗詔以寧為郢州刺史鄂岳沔都團練使及淮東西郢岳租庸鹽鐵緣江轉運使

韓滉代宗大歷六年以尚書右丞改戶部侍郎判度支初自肅宗至德乾元以後所在軍興賦稅無度帑藏給

納多務因循滉既掌計司清勤檢轄不容姦妄後為鎮  
海軍節度使至德宗貞元二年來朝時右丞相元琇判  
度支以關輔旱儉請運江淮租米以給京師德宗以滉  
浙江東節度素著威名加江淮轉運使又加度支運  
鹽鐵等使

杜佑以肅宗大歷末為金部郎中充水陸轉運使改金  
部度支郎中兼和糴等使時方軍興餽運之務悉委於  
佑遷戶部侍郎判度支

韓洄德宗建中元年以諫議大夫為戶部侍郎判度支  
先是大歷末罷判度支併其務令轉運使劉晏兼領之  
晏既罷黜令天下錢穀各歸尚書省令本司各廢罷職  
事久矣徒收其名而莫綜其權國用出入未有所統故  
復命洄還判度支而令金部郎中杜佑為權勾當江淮  
水陸運使如劉晏韓滉舊制也

包佶建中二年以駕部郎中權勾當諸道輕貨鹽鐵使  
兼充江淮水陸運使

崔縱建中末為汴西水陸運兩稅使兼充魏州四節度行營都糧料使時馬燧李懷光等計田悅久無功或以軍食不繼為辭故命縱於澤潞之郊督促餽運

齊抗興元初為工部員外郎充江淮宣慰判官會朱泚初平旱蝗之後國用空耗轉運使元琇以抗有才奏為倉部郎中條理江淮鹽務貞元初琇又奏抗為水陸運副使督江淮漕運以給京師

班宏貞元初為吏部侍郎是歲仍歲旱蝗皇帝以賦調為

急改戶部侍郎為度支使韓滉之副

蘇弁貞元中為倉部郎中仍判度支案時裴延齡卒德宗聞其才特開延英面賜金紫授度支郎中副知度支事仍命立於正郎之首副知之號自此始也

王紹貞元中為倉部員外郎時屬兵革旱蝗之後令戶部收闕官俸兼稅茶諸色無名之錢以為水旱之備紹自拜倉部使准詔主判及遷戶部郎中皆獨司其務擢拜戶部侍郎尋加判度支至憲宗元和七年以兵部尚

書權判戶部

李巽貞元末為兵部侍郎時司徒杜佑判度支鹽鐵運使以巽幹理奏為副使累月代佑全領度支鹽鐵等使孟簡元和中代崔羣為戶部侍郎是官有二員其判使案者別居一署謂之左戶元和以還號為清重之最宰輔登用多由此而去故羣入相以簡代焉

王遂元和中自司農卿出為柳州刺史數年用兵淮西天子藉錢穀吏以集財賦知遂強幹乃用為宣州刺史

宣歙觀察使淮蔡平王師東討召拜光祿卿充淄青行營諸軍糧料使

薛王知柔昭宗乾寧二年以京兆尹兼戶部尚書判鹽鐵度支事制曰國家自盜蠭中原兵纏九縣支度牢籠之務施張經制之宜率煩台臣旁綜使務綱條既正豐阜可期宜擇通才俾繼成績僉曰叔父膺予揀求詢謀協同毗賴惟允即以虛位并而授之匪私吾宗示張王室惟爾嗣同薛王知柔我之近屬國之材人識大體以

立朝蘊嘉謀而致用粵自典司宗祐尹正神臯庇本枝  
而敦序有倫臨帝甸而汚菜盡闢政惟務本生靈懷衣  
食之源令著先庾豪右屏椎埋之迹人懷其惠吏不敢  
欺封畿新轉置之規園寢備薦羞之禮府署完葺京師  
底寧疇茲多能孰可加爾朕言念銅鹽之重賦輿之殷  
勞於鈞衡多歷年所今將授爾用展其材矧乃司存此  
專郎吏乾元多難方委公卿離之合之各繫緩急今我  
用爾思復舊章惟簡身可以律人惟奉上可以御下取

舍勿因於利任使惟其所知無以公務結私恩無以公  
方樹私怨惟是六者竭乃一心副吾超拔之恩濟我艱  
難之運悉仍舊貫別示殊恩於戲朝廷之本軍國之用  
佇爾康濟紓吾焦勞往佩寵光勉施才術苟不稱是又  
何敢以叔父私於天下哉

後唐孟鵠明宗天成二年以樞密院承旨充三司副使  
權判三司鵠本魏州案吏也初莊宗初定魏博選幹吏  
以計兵賦鵠為度支孔目官掌邢洺錢穀司明宗時為

邢洺節度使軍賦三分之一屬霸府鵠於調弄之間不  
苛急每事曲意承迎上心甚德之而度支使孔謙專典  
軍賦而於藩鎮徵督苛急明宗嘗切齒及即位鵠時為  
租庸院勾官擢為客省副使樞密院承旨當年為三司  
副使長興二年遷左驍衛大將軍充三司使

王攷愍帝即位初自光祿卿三司副使判院事充三司  
使秦府之亂三司使孫岳死之故命攷權判帝自鄴登  
極復用攷焉

晉劉處讓初仕後唐為左驍衛大將軍清泰三年夏魏  
博屯將張令昭逐其帥以城叛朝廷命范延光領兵討  
之以處讓為河北都轉運使

漢劉審交初仕後唐為北面轉運使判官王都叛於定  
州朝廷命王晏專師進討審交為轉運供軍使都平  
以為遼州刺史後為北面供軍使晉高祖初踐祚范延  
光以魏州叛命楊光遠總兵討之復召審交為供饋使

鄆中平命審交為三司使

王章初事高祖為侍衛都孔目官從至河東專委錢穀及即位初除三司使

周高防以世宗顯德五年自戶部侍郎為西南面水陸轉運制置使時帝將用師於西南故有是命

材畧

易曰聚人曰財語曰既富而教是知為國家者本乎邦計故自炎漢而下必慎選其材所以典邦賦而裁制國用者也若乃精心以運策勵志以奉公百慮無失秋毫

必舉民不賦歛物皆阜積綱條以制經費以時軍儲有  
餘歲會有羨史稱逸於任人又曰國以人富斯可見矣  
漢東郭咸陽姓東郭名咸陽武帝時與孔僅為大農丞領鹽鐵  
事桑弘羊以心計年十三侍中故三人言利事析秋毫  
矣

耿壽昌宣帝時為大司農中丞以善為筭能商功利得  
幸於帝商度也

魏任峻漢末為典農中郎將數年中所在積粟倉廩皆

滿國中之饑起於棗祗而成於峻

臣欽若等按魏志羽林監棗祗進置屯田

太祖以峻為典農中郎將

鄧艾明帝時為尚書郎時欲廣田畜穀為減賦資使艾行陳項已東至壽春艾以為田良水少不足以盡地利宜開河渠可以引水澆溉大積軍糧又通漕運之道乃著濟河論以喻其旨正始二年乃開廣漕渠每東南有事大軍與衆汎舟而下達于江淮資食有儲而無水害艾所建也

蜀諸葛亮後主時為右將軍行丞相事建興九年出祁山以木牛運十二年春悉大衆繇斜谷出以流馬運據武功五丈原亮長於巧思木牛流馬皆出其意

木牛流馬法具

總錄功  
巧門

晉杜預武帝時為度支尚書奏立籍田建安邊論處軍國之要又作人排新器興常平倉定穀價較鹽運制課調內以利國外以救邊者五十餘條皆納焉

後魏崔亮為度支尚書自孝文遷都之後經畧四方又

營洛邑費用甚廣亮在度支別立條格歲省億計

朱元旭為度支郎中時關西都督蕭寶寅啓云所統十萬食唯一月於是孝明大怒召問所繇錄令已下皆推罪於元旭元旭入見於御座前屈指較計蕭寶寅兵糧乃踰一年事乃得釋

後周達奚實仕西魏為中外府司馬大軍伐蜀以實行南岐州事兼都督軍糧先是山氏生獵不供賦役歷世羈縻莫能制御實導之以政氐人感悅並從賦役於是

大軍糧餉咸取給焉

趙肅仕魏為獨孤信治中別駕信東討肅率宗人為鄉導監督糧儲軍用不匱太祖聞之謂人曰趙肅可謂雒陽主人也

權景宣為外兵郎中從開封府于僅援雒陽景宣督糧課儲軍以周濟

唐第五琦天寶末為北海郡錄事參軍因奏事至蜀中得謁見因奏言方今之急在兵兵之強弱在賦賦之所

出江淮居多若假臣職任使濟軍須臣能使賞給之資  
不勞聖慮玄宗大喜即日拜監察御史勾當江淮租庸  
使乾元初為河南等道五道度支使促辦應卒事無違  
闕

劉晏代宗永泰中為度支鹽鐵轉運租庸等使先是肅  
宗至德初為國用不足令第五琦於諸道榷鹽以助軍  
用及晏代其任法益精密官無遺利初歲入錢六十萬  
貫季年所入逾十倍而人無厭苦李靈曜之亂也河南

節帥所據多不奉法令征賦亦隨之州縣雖益減晏以  
羨餘相補人不加賦所入仍舊議者稱其能自諸道巡  
院距京師重價募入疾足置遞相望四方物價之上下  
雖極遠不四五月故知食貨之重輕盡權在掌握朝廷  
獲美利而天下無甚貴甚賤之憂得其術矣

韓滉大歷六年為戶部侍郎判度支初自至德乾元已  
後所在軍興賦稅無度帑藏給納多務因循滉既常司  
計清勤檢轄不容姦妄下吏及四方行綱過犯者必痛

繩之又屬大歷五年已後藩戎南侵連歲豐稔故滉得  
儲積穀帛帑藏積實

崔縱德宗建中末為大理少卿汴西水陸運使及車駕  
蒙塵四方握兵未至者縱先知之潛告李懷光說令奔  
命懷光從之縱乃悉歛軍財與懷光俱來調給甚備懷  
光軍士久戰河外及次河中將遷延縱之貨幣先以渡  
河縱謂衆曰若濟悉以分賜衆利之乃西至奉天

杜佑貞元初為度支鹽鐵等使度支以制用惜費漸權

百司之職廣署吏員繁而難理佑始奏營繕歸之將作  
木炭歸之司農染練歸之少府綱條頗整公議多之

李巽憲宗元和初為度支鹽鐵等使榷筦之法號為難  
重唯大歷中僕射劉晏雅得其術賦入豐羨巽為之一  
年征課所入類晏之多歲明年過之又一年加一百八  
十萬貫舊制每歲運江淮米五十萬斛抵河陰久不盈  
其數唯巽三年登焉巽精於吏職蓋天性也雖在私家  
亦置案讀書勾檢如公署人吏有過絲毫無所貸雖在

千里外其恐懼嘗若在巽之前

程异元和中為鹽鐵轉運副使時方用兵國用不足命  
异使江淮以調征賦且諷有土者以饒羨入貢至則不  
剥下不浚財經費以贏人頗稱之

王播元和中為刑部侍郎充諸道鹽鐵轉運使播長於  
吏術雖簿牘鞅掌剖析如流黠吏詆欺無不彰敗

王彥威為戶部侍郎判度支進古額圖一軸彥威先因紫宸  
殿奉所撰度支錢穀文書皆量入為出使經費必足無

所尅簿奏且百口之家猶有年計而軍國錢物一切通用臣今悉隨色額占定終歲支遣無毫釐之差儻臣一旦愚迷欲自欺竊亦不可得矣

後唐孔謙莊宗為晉王時以謙為度支使河上用兵及燕趙征討前後十餘年飛輓徵取不至匱乏莊宗成霸業謙有調發之力焉

晉韓祚天福初為尚書左丞高祖幸鄆都祚留京師權判三司祚有心計能判其事時百官委困國用不繼祚

必多方以時物給之謂吏曰昔四豪為小國之相皆能  
養三千客且天子之廷執事者所請有幾安能耗於國  
乎人以斯言為當

漢王章隱帝乾祐初為三司使居無何蒲雍岐三鎮叛  
是時契丹犯闕之後國家新造物力未充章與史宏肇  
楊邠等罷不急之務惜無功之費收聚財賦專事西征  
軍旅所資供饋無乏及三叛平賜與之外國有餘積

褒寵

王者備凶年之賑貸防殊俗之侵軼必將豐其財足其食苟非寵心計精忠之志褒夙夜在公之勤何以委支度之權專漕輶之任損有餘而補不足撫困窮而抑併兼焦心苦思乘傳舉行既集軍國之饒遂享便蕃之澤者哉列之編次來者作程

漢孔僅武帝時與東郭咸陽

姓東郭  
名咸陽

為大農丞領鹽鐵

事乘傳舉行天下鹽鐵

舉皆也普天之  
下皆行之也

作官府至鬻鐵及出納

處之僅三年中至大司農

耿壽昌宣帝時大司農中丞五鳳中奏言宜糴三輔弘農河東上黨太原郡穀足供京師可以省關東漕卒過半天子從其計漕事果便壽昌遂白令邊郡皆築倉以穀賤時增其價而糴以利農穀貴時減價而糴名曰常平倉民便之帝乃下詔賜壽昌爵關內侯

魏任峻漢末為典農中郎將數年中所在積粟食廩皆滿軍國之饑成於峻太祖以峻功高乃表封為都亭侯邑三百戶遷長水校尉

後周寇雋初仕魏為鹽池都將永安初華州民史底與司徒楊椿訟田長史以下以椿勢貴皆言椿直欲以田給椿雋曰史底弱民楊公橫奪其地若欲損不足以給有餘今見使雷同未敢聞命遂以地還史底孝莊帝後知之嘉雋守正不撓即拜司馬賜帛百匹其附椿者咸譴責焉

唐韋挺貞觀中為太常卿時太宗伐遼東令挺先運糧河北諸州以便宜從事帝親解貂裘及內廄馬二疋賜

之

韋堅天寶元年為陝西太守充水陸運使及江淮租庸轉運等使堅以漕運通於京師歲益鉅萬乃召水工審地脉於咸陽擁渭水作興成堰截灞灘至渭而東至潼關永豐倉下與渭合遂於苑東望春樓下穿潭以通舟楫既成而元宗親幸望春張樂宴羣臣堅素備山東船數百艘於潭側每船皆標榜曰某郡船船中悉貯本郡貨物連亘數里觀者如堵帝甚歡詔曰古之善政貴於

足食將欲富國必先利人朕以關輔之間尤資殷贍比來轉輸未免艱辛故置此潭以通漕運萬代之利一朝而成將允懷於永圖豈苟求於縱觀其郡太守韋堅始終檢校夙夜勤勞賞以有功則惟常典宜特加三品仍改授一子三品京官兼大守其判官等則量與改轉仍委韋堅具名錄奏應役人夫各酬庸直兼放今年地稅且啓鑿功卑舟楫已通其押運綱既涉遠途又能先至各賜一中上考船夫等共賜錢一千貫以充晏樂又賜其

潭名廣運堅遂加銀青光祿大夫左散騎常侍其陝郡  
太守水陸運使及江淮租庸轉運等使如故

第五琦天寶末為監察御史勾當江淮租庸使尋加河  
南等三道又度支促辦應卒事無違闕累遷司金郎中  
兼御史中丞於是創立鹽法人不益稅而上用以饒遷  
戶部侍郎專判度支領河南等道支度勾當轉運租庸  
鹽鐵鑄錢司農太府出納山東南江西淮南館驛等使  
元載上元中為度支郎中知性敏悟善對肅宗嘉之委

以國計俾充使江淮都領漕輓之任尋加御史中丞數月徵入遷戶部侍郎充度支并諸道轉運使

韓滉為鎮海軍節度使加江淮轉運使令專督運務貞元元年十一月癸卯日南至德宗祀昊天上帝于圜丘禮畢詔曰江淮轉運檢校尚書左僕射平章事韓滉勵精勤職夙夜在公漕輓資儲千里相繼可封晉國公明年秋初江淮漕米大至京師帝嘉其功以滉專領度支諸道鹽鐵轉運等使

韋肇為劍南西川運糧使檢校戶部員外郎貞元十二年加兼御史大夫員外郎兼大夫新例也

王紹貞元中為倉部員外郎時屬兵革旱蝗之後令戶部收闕官俸兼稅茶及諸道無名之錢以為水旱之備紹准詔主判及遷戶部郎中皆獨司其務十三年擢拜戶部侍郎尋判度支二年遷戶部尚書

李巽憲宗元和初為兵部侍郎領度支鹽鐵使掌使一年征課所入類劉晏之多明年過之又一年加一百八十

萬貫遷兵部吏部尚書使任如故

崔俊為荆南道兩稅使程异為浙江東道兩稅使元和七年七月俊賜金紫異賜朝散大夫以入計叙勞也

皇甫鑄為戶部侍郎判度支元和十一年方討淮夷切於饋餉鑄嚴急辦集益承寵顧加兼御史大夫

後唐孔謙莊宗同光元年為租庸使守衛尉卿二年八

月賜豐財贍國功臣

烏震明宗天成中為冀州刺史兼北面水陸轉運招撫

等使契丹犯塞漁陽路梗震率師運糧三入薊門擢為  
河北道副招討遙領宣州節度使

晉李象為駕部郎中少帝開運三年加朝議大夫周易  
博士呂彥繇太府少卿董詢並加朝散大夫吏部員外  
郎曾震改祠部郎中左拾遺崔頌加朝議郎皆以監諸  
道榷稅溢額故也



冊府元龜卷四百八十三

欽定四庫全書

子部

冊府元龜卷四百八十六至四至

詳校官中書臣丁榮祚

侍讀臣孫球覆勘

總校官庶吉士臣何思鈞

校對官中書臣陸湘

謄錄監生臣沈希曾

欽定四庫全書

冊府元龜卷四百八十四 宋 王欽若等 撰

邦計部

經費

周官太宰之職以九式均節財用又置國用必於歲之  
杪量入以為出此邦家經費之制也蓋夫富有諸夏維  
御羣品必慎財賦以均用度若乃兵戎祭祀之給祿廩  
賜予之數乘輿之奉養庶事之供擬固亦有常制矣其

或觀風展義舉時巡之典陳師鞠旅揚天討之威或勁敵來降遣將以臨塞或敵國授首勞師以行賞斯皆常限之外厥費寢廣加以水旱為沴饑饉荐臻於是乎稽防救之術為裁損之策去其不急取其有餘以至推振廩之仁遣墾田之議雖恩繇人主而責成有司歷代之云為皆可覲矣

漢高祖平項羽天下以定民亡蓋藏無物可蓋藏自天子不

能具醇駟

醇不雜也無色醇之謂駟馬雜色也

而將相或乘牛車以牛駕車

也 帝於是約法省禁輕田租什伍而稅一量吏祿度用  
以賦於民

纔取足

供不入國

各常也

言

中都歲

漕轉

開東粟

給

各

歲

至封君湯沐邑皆各為私奉養不領於天子之經費

言

收其所賦稅以自供不入國朝之倉廩府庫之經常也 漕轉開東粟以給中都歲不過數十萬石

武帝時驃騎將軍霍去病仍再出擊胡大克獲

仍頻渾也

渾

邪王率數萬衆來降

渾音胡昆反

常也

言

各

歲

一兩一乘既至受賞賜及有功之士費凡百餘鉅萬先是胡

降者數萬人皆得厚賞衣食仰給縣官

仰音牛向切

縣官不

給

給足也

天子乃損膳解乘輿駟出御府禁藏以澹之

其後大將軍衛青及去病大出擊胡賞賜十萬金軍馬  
死者十餘萬匹轉漕車甲之費不與焉

與讀曰豫

是時財匱

匱財乏也

戰士頗不得祿矣

元封中武帝北至朔方東封泰山巡海上旁北邊以歸

旁音步浪切所過賞賜用帛百餘萬匹金錢以鉅萬計皆取

足大農

後漢章帝元和中穀貴縣官經用不足朝廷憂之尚書  
張林上言穀所以貴由錢賤故也可盡封錢一取布帛  
為租以通天下用又鹽食之急者雖貴人不得不須官  
可自鬻又宜因交趾益州上計吏往來市珍寶收采其  
利武帝時所謂均輸者也於是詔諸尚書通議尚書朱  
暉奏據林言不可施行事遂寢後陳事者復重述林前  
議以為於國誠便帝然之有詔施行暉復獨奏曰王制  
天子不言有無諸侯不言多少食祿之家不與百姓爭

利今均輸之法賈販無異鹽利歸官則下人窮怨布帛為租則吏多姦盜誠非明主所當宜行帝卒以林等言為然

順帝永建元年令安定北地上郡及隴西金城常儲穀令周數年

永和元年以西羌反叛二十餘年兵連師老軍旅之費三百二十餘億

六年詔貸王侯國租一歲

漢安二年詔貸王侯國租一歲

桓帝延熹五年八月詔減虎賁羽林住寺不任事者半奉勿與冬衣

東觀記曰以軍師水旱疫病帑藏空虛虎賁羽林不任事者住寺減半奉據此謂簡

選疲弱不勝軍事者留住寺也是年十月假公卿以下奉又換王侯租以助軍糧出濯龍中藏錢還之

八月段紀明為護羌校尉上言伏計永初中諸羌反叛十有四年用二百四十億永和之末復經七年用十八餘億費耗若此猶不誅盡

魏齊王正始元年秋七月詔曰易稱損上益下節以制度不傷財害民方今百姓不足而御府多作金銀雜物將奚以為今出黃金銀物百五十種千八百餘斤銷治以供軍用

晉明帝太寧元年以軍國饑乏調刺史以下米各有差後魏道武天興五年帝聞姚興將寇邊庚寅大簡輿徒詔并州諸軍積穀于平陽之乾壁

明元泰常三年九月詔諸州調民租戶五十石積於定

相冀三州

宣武正始元年九月詔緣淮南北所在鎮戍皆令及秋播麥春納粟稻隨其土宜水陸兼用必使地無餘力比其來稔令公私俱濟也

後周太祖初為魏相創制司倉嘗辦九穀之物以量國用國用足蓄其餘以待凶荒不足則止餘用用足則以粟貸人春頒之秋歛之

隋高祖開皇九年陳平帝親御朱雀門勞凱旋師因行

慶賀自門外夾道列布帛達於南郭以次頒給所費三百餘萬段十一年江南又反越國公楊素討平師還賜物甚廣其餘出師命賞亦莫不優隆

煬帝大業初戶口益多府庫盈羨及帝將事遼東增置軍府掃地為兵自是租稅之入益減矣

唐高祖平京師傾府藏以賜勳人既而又患國用不足太原人劉義節進計曰今義師數十萬並在長安樵貴而布帛賤若伐街衢及苑中之樹為樵以易布帛歲取

數萬匹立可致也又藏內繒絹疋皆有餘軸之使申裁  
取剩物以供雜費動盈十餘萬段矣高祖並從之大收  
其利

玄宗開元十六年勅曰年支和市合出有處官既酬錢  
無要率戶如聞州縣不配有家率戶散科費損尤甚設  
今給假亦慮隱藏宜令所司更申明格勅應欲反配須  
審料度所有和市各就出處

二十六年正月制長安萬年兩縣各與本錢一千貫收

利供驛仍付雜驛

三月乙酉河南雒陽兩縣亦借本一千貫收利充人吏  
課役

肅宗乾元元年四月庚午勅諸司諸使支一物已上商  
量減省三分之二以兩京初收務令節儉

代宗廣德二年九月戊戌諸道稅地錢物使左僕射裴  
冕請進百官俸祿二萬貫助耀軍糧許之

永泰元年冬郭子儀率迴紇兵大破吐蕃詔稅百官錢

市絹十萬匹以賞廻紇時師旅荐興急於饋運百僚上  
表請納職田充軍糧許之

大歷二年九月吐蕃寇靈州命有司運米二萬石供靈  
州軍是年冬率城百官士庶錢充朔方軍糧其六軍兵  
士不存此限九年五月乙丑勅曰四海之內方叶大寧  
西戎無厭獨阻王命不可忘戰尚勞事邊朕頃以兵革  
之役軍國空耗躬率節儉務勸農桑上玄儲休仍歲大  
稔益用大愧不知其然雖屬此人和近於家給而邊穀

未實戎備猶虛因其天時思致豐積將設平糴以之饋軍然以中都所供內府不足粗充常入之數豈齊倍餘之收其在方面蓋臣成茲大計共佐公家之急以資塞下之儲應諸道每歲皆有防秋兵馬其淮南四千人浙西三千人魏博四千人昭義二千人成德三千人山南東道三千人荆南二千人湖南三千人山南西道二千人劍南西川三千人劍南東川二千人鄂岳一千五百人宣歙三千人福建一千五百人其嶺南江南浙西浙

東等亦合准例恐路遠往來增費各委本道節度觀察使都團練等使每年當使諸色雜錢及廻易利潤贓贖錢物每人計二十千每道各據所配人數都計市輕貨送上都左藏庫貯納約充別勅和糴用並不得尅當將軍士衣糧充數仍以和收送畢

德宗大歷十四年正月即位閏五月丁亥內田宅使上言州府有官租萬四千餘斛上令分給所在以為軍儲十二月己卯詔曰凡財庫皆歸左藏庫一用舊式每歲

於數中擇精好之物三五十萬匹進納大盈庫而度支先以全數聞

建中四年討李希烈時李燧李懷光李抱真李克四節度之兵屯於魏縣李晟退次易州李勉陳少遊劉洽哥舒曜等屯於淮汝之間神策并劍南東西二道浙西荆南江西湖南黔中領南沔鄂等道之兵皆進臨賊境諸道行營出其境者糧料皆仰給度支謂之食出界糧又於諸軍各以臺省官一人司其供億謂之糧料使帝尤

卹軍士每出境者加給酒肉本道之糧又留給妻子凡  
境一人兼三人之糧由是將士利之纔進召逾境以規  
供費故諸軍月費錢一百三十餘萬貫判度支侍郎趙  
贊以常賦不足用乃請採蓮州白銅鑄大錢以一當十  
權其輕重又請置大田天下人田計其頃畝官收十五  
之一擇其上腴樹桑環之公田公桑自王公至於匹庶  
差借其力得穀絲以給國用詔從其說贊熟計之自以  
為非便皆寢不下請行常平稅竹木茶漆之法

興元初李晟為神策行營節度使時李懷光叛德宗再幸梁州初無芻藁乃令檢校戶部郎中張彧假京兆尹擇官吏以賦渭北畿縣不數日芻糧皆足後為副元帥討朱泚時渭橋先積米鹽十餘萬斛度支方運以備懷光軍嚴又密疏以謂近畿雖乘兵亂尚可賦斂寇盜未滅宿兵曠時人廢耕桑又無儲蓄非防微制勝之術也帝深納之至是守禦益固軍不乏食

貞元元年自春大旱麥枯死禾無苗度支奏京師經費及關

內外征討士馬月須米鹽五十三萬石錢六十萬貫草三百八十三萬圍春冬衣賜元日冬至立仗賜物不在其中時漕江東租賦百餘萬貫在江陵度支主吏宋棲桐無部置遇火焚之國用益窘關中百姓蒸蝗曝颶去翅足而食之人心大恐

二年十月度支奏京兆河南河中同華陝虢晉絳鄜坊丹延等及州府秋夏兩稅青苗等物悉折糴粟麥所在儲積以備軍食京兆兼給錢收糴每斗于時估外更加

十錢納于太倉詔可其奏自是每歲行之以贍軍

十一月度支奏請于京兆府折明年夏秋稅錢二十二萬四千貫文又請度支給錢添成四十萬貫令京兆府今年內收糴粟麥五十萬石以備軍食詔從之

十二月度支使奏先准勅以河中兩池鹽充諸軍收城將士賞錢自榷法不行旅商頗絕請一切罷之其所欠賞錢待江淮鹽利續至即給從之

三年閏五月度支奏請浙江東西節度使韓滉自建中

年已後供軍資費賞設等每年續加當錢六十一萬六  
千貫准今年五月五日勅近日甲兵止息無別徵求此  
是常稅先有成例宜令浙西觀察使白志貞浙東觀察  
使皇甫政各據本道元額依舊每年兩稅徵收發遣其  
錢物到別庫收貯每有給用皆先奏取進止其錢舊例  
每年六月舉徵至秋限送納今京西師旅頗衆經用尤  
多望令依稅限納市經貨送上都從之

四年二月詔以中外給用除陌錢及關官俸外一分職

田停額內官俸及刺史執刀司馬軍事等錢令寶參專掌之以給在軍京文武官俸料先是京兆俸薄多不自贍帝特命有司厚其月給自是京官益重頗優裕焉初除陌錢隸度支帝以度支自有兩稅及鹽鐵榷酒錢物以充經費是錢宜別貯之給京官俸料之餘以備他用自此戶部別庫稅歲貯錢物僅三百萬貫京師俸料所費不過五十萬貫其京兆和糴物價及度支給諸軍冬衣或闕悉以是錢充之他用之外常貯僅二百萬貫國

計賴焉是年涇原節度劉昌與隴右節度李元諒於涇州及潘原收軍田粟數萬石初劉昌遣兵數千屯於潘原以禦藩寇自是邊軍頗有儲積

八年五月以都官郎中鄭克鈞為靈夏二州運糧使吐蕃之圍靈州軍食絕及吐蕃稍却鈞自夏州以牛馬雜運米六萬餘斛致靈州度支又於勝州沂河運雲朔米萬餘斛是秋雲州亦有積年穀稻數萬斛人心頗固十月以西北邊穀賤詔令度支增價和糴以實邊儲凡

積米三十萬斛是年裴延齡為戶部侍郎判度支奏請令京兆府以兩稅青苗錢市草一百萬圍送苑中宰相陸贊趙憬議以為若市送百萬圍草即一府百姓自冬歷夏般載不了百役供應須悉停罷又妨奪農務請令府縣量市三二十萬圍各貯近處時要即支用

九年五月福建觀察使福州刺史王栩奏諸州並設軍額防虞役使更置執刀甚為煩費既乖簡要又給資糧況臣本道頻遇水旱百姓艱乏職貢或闕臣自到官已

訖停其管諸州並請停罷其資糧等望借臣充當管軍  
資所要待年豐人戶歸復即收送度支以裨國用制曰  
可其資糧二年後令戶部准停減例收管諸州府執刀  
亦宜省罷其資糧委戶部徵收

憲宗元和四年三月辛未靈武節度使范希朝奏請於  
太原防秋官健中以六百人衣糧充給沙陁突厥從之  
六年十二月辛未勅黔中水災之後又宸叙初安如聞  
軍府之間每事罄竭俾其存濟須有優矜其涪州緣屬

荆南有供荆南節度錢二千四百貫令隨本州割還黔府兼於涪州送省錢三千八萬貫文內更取一千五百貫添賜黔府見在將士軍資

七年七月戶部侍郎判度支盧坦奏今年冬諸州和糴貯備粟澤潞四十萬石鄭滑易定一十五萬石河陽一十萬石太原二十萬石靈武七萬石夏州八萬石振武豐州鹽州各五萬石凡一百六十萬石以今秋豐稔必資蓄備其澤潞易定鄭滑河陽委本道差判官和糴各

於時價每斗加十文所冀人知勸農國有常備從之

八年六月丙戌以東都留守韓臯為檢校吏部尚書兼  
許州刺史御史大夫充忠武軍節度等使勅以陳許二  
州經水澇賜臯綾絹布葛十萬疋以佐軍資備宴賞  
十一月癸酉昭義節度使郗士美奏請以其衆鎮于臨  
雒就食

十年十一月癸亥詔以內庫繒絹五千萬疋付左藏庫  
以供軍

十一年九月己丑勅寇賊未平國用茲廣若加賦歛重  
困黎元行權取濟自今已應內外支用錢宜每貫除墊  
陌外量抽五十文仍於本道本使據數逐季收計其諸  
道錢使綱部送副度支收管隨貯納以備軍須賊平後  
則依常制從有司之請也

十一月以內庫錢五十萬貫出付度支供軍十二年正  
月甲申鹽鐵轉運使王播奏伏以軍興之時在繫財賦  
國用之本出於江淮頃者劉晏掌領鹽鐵租庸每自巡

按至於錢穀利病州縣否減隨以上聞使得釐革臣緣  
在城務重不獲躬行伏望遣臣副使程昇特以詔命出  
巡江淮其諸州府上供錢米如妄託水旱輒有破除伏  
請委程昇一切勘實聞奏其度支戶部并臣當司合送  
上都行營錢物并令急切催促其遠年逋欠亦委具可  
徵之數聞奏從之因令昇與淮南浙東宣歙江西河南  
嶺南桂管福建等道觀察使計會各減常用去浮費取  
其羨助軍是月壬辰詔出內庫紬布綿共九十一萬端

匹銀五千兩付度支饋運九月戊子詔以內庫羅縠及  
犀玉金帶之具及婦人首飾送度支令歸其直

十三年二月壬午內出玳瑁梳四百隻犀帶具五百副令  
度支出賣進直

六月內庫出絹三十萬匹錢三十萬貫付度支給軍用  
十四年二月乙卯出內府錢帛貫匹共一萬付度支給  
軍用

十五年五月壬寅朔癸卯詔曰比緣用兵歲久初息干

戈百役所資國用多闕不可更加賦稅重擾疲人參酌  
權宜事貴通濟自今已後應內外支用錢宜於天下收  
兩稅鹽利榷酒稅茶及職掌人課料等錢並每貫除舊  
墊陌外量抽五十文委本道本司本使據數逐季收計  
其諸道錢使差綱部送並付度支收等待一二年後國  
用稍充即依舊制其京百司俸科文官已准別勅每月  
量抽修文宣王廟不可重有除減武官所給較薄亦不  
在抽限

七月乙卯勅自今已後新除觀察節度使到任日具見在錢物斛斗器械數分析以聞

穆宗長慶元年二月浙東奏准詔停老弱官健收衣糧四月己丑河南尹韋貫之請以去年夏末至今年夏初供館驛外剩錢一萬三千五百八十貫草九萬五百八十束代百姓填元和十一年至十五年逋欠及今年夏稅從之

十二月乙亥勅諸道州府每年徵納兩稅除送上都外

留州留使錢緣草賊未殄費用滋廣兩稅之外難議加徵然其饋運之間又須得濟諸道留使錢宜令長吏於諸色給用中每貫量減二百文以資軍用事平之後即任仍舊壬午出內藏庫五萬貫付度支以備軍須

二年正月內出繒帛八萬匹付度支以助軍資

四月辛未詔曰頃以寇賊未殄費用滋廣先有詔勅於諸道留州留使給用錢中每貫量抽二百文今兵戎已戢經費有常其抽錢宜從今年四月十一日已後停切

令官吏所在知委不得妄有增減

七月以討汴州李齊內出綾絹五十萬匹付度支以充

軍用

敬宗以長慶四年正月即位三月大赦制官禁經費及乘輿服膳委所司起今年三月其本色物價及水陸腳價一半委度支收管一半使任本州收充助貧下戶閼額稅錢

寶歷二年五月辛巳勅如聞度支近年請諸色支用常

有欠闕今又諸軍諸使衣賜支遣是時須有萬員使其濟辦宜量賜絹及紬一萬匹以戶部物充

七月壬辰戶部侍郎崔元畧進准宣索見在左藏庫挺銀及銀器十萬兩金器七千兩舊制戶部所管金銀器悉貯於左藏庫時帝意欲便於賜與故命盡輸內藏文宗太和元年三月鹽鐵使王播進停減鹽鐵官吏課料絹一萬六千三百匹

六月司空兼門下侍郎平章事判度支裴度進金六十

八挺

十一月庚寅勅李寰下將士衣糧舊准神策軍例支給  
今初移鎮五令度支且准舊例處分待滄景事平後仍  
委條流聞奏

二年十月辛酉勅寧武軍士馬悉在行營不同常日舊  
賜綾絹二萬匹仍委度支逐便支送

四年五月戊子罷度支每年於劍南西川織造年支綾  
羅錦等共八千一百六十七匹令數內減二千五百十四

九年春正月甲戌中書門下奏太倉見在粟二百六十萬八百五十四石並請留充貯備不承別勅不在給用之限如有特勅支用亦須覆奏從之

七月乙巳戶部尚書判度支王璠奏東渭橋每年北倉收貯漕運糙米一十萬石以備水旱今累年計貯三十萬石請以今年所運者換之自是三歲一換率以為常則所貯不陳而耗蠹不作許之

開成元年正月一日赦詔京兆府附一年所支用錢

物斛斗草等並勒鹽鐵使以開成元年直進綾絹充還  
辛酉鹽鐵使左僕射令狐楚請以罷修曲江亭子絹一  
萬三千七百匹廻修尚書省

二月度支奏每年供諸司并畿內諸鎮軍糧等計粟麥  
一百六十餘萬石約以錢九十六萬六千餘貫糴之畿  
內百姓每年納兩稅見錢五十萬貫約以粟麥二百餘  
萬貫糴之是度支糴以六十而百姓糴以二十五農人  
賤糴利歸商徒度支貴糴賄行黔吏今請以度支貴糴

錢五十萬貫送京兆府充百姓一年兩稅勒二十三縣代緝輸粟八十萬石小麥二十萬石充度支諸色軍糧則開成三年以後似每歲放百姓一半稅錢又省度支錢一十萬貫勸農減費物理昭然仍請百姓廣開田畝更不加稅行之有節富庶可期詔付京兆府夏季以前先造戶帖務使平允凡折納之術行於豐年斯惠農務苟非豐登人用苦之蓋輸緝易而輸粟難也

武宗會昌元年赦曰應州縣等每有過客衣冠皆求應

接行李苟不供給必致怨尤刺史縣令務取虛名不惜百姓夫蓄皆配人戶酒食科率所繇令虛通領狀招領價錢又陳設之物遍擾閭里蠹政害人莫甚為甚宜委本道觀察使條流量州縣大小及道路要僻各置本錢逐月收利前觀察使刺史前任臺省官不乘館驛者許量事供給其前便以留州留使及羨餘錢充每至季終申觀察使不得輒配所由人戶並限赦書到後一月內處置訖聞奏虛立名目妄破官錢依錢科配並同入以

枉法贓處分縣令已下親故以家口同行者並須以料  
錢供給不得擅配店戶祇供其所在食估切宜禁斷如  
有犯者並以贓論仍委御史臺及所在巡按常加察訪  
懿宗咸通五年五月丁酉詔如聞湖南桂州是嶺路係  
口諸道兵馬綱運無不經過頓遞供承動多差配凋傷  
轉甚宜有恩宥潭桂兩道各賜錢三萬貫文以助軍錢  
以充館驛息利本錢其江陵江西鄂州三道比於潭桂  
徭配稍簡宜令本道觀察使諸官閑劇准此例與置本

錢

七月壬子延資庫使夏侯孜奏鹽錢戶部先積欠當使  
咸通四年已前延資錢絹三百六十九萬餘貫疋內戶  
部每年合送錢二十六萬四千二百八十五貫疋從大  
中十二年至咸通四年九月已前除納外欠一百五十  
萬五千七百一十四貫疋當使緣戶部積欠數多先具  
申奏請於諸道州府塲院合納戶部所收八十文除陌  
錢內割一十五文屬當使自收管勅命須行送納稽緩

今得戶部牒稱所收除陌錢除錢絹外更有諸雜貨物  
延資庫徵收不便請起今年合納延資庫錢絹一時便  
足其已前積欠候物力稍充積漸埋填其所割十五文  
錢即當司仍舊收管又緣累歲已來嶺南用兵多支戶  
部錢物當使不欲堅論舊欠請依戶部商量合納今年  
一年額色錢絹須足明年即依舊制三月九月兩限送  
納畢其已前積欠仍令戶部自立填納期限者勅旨依  
之

八年九月丁酉延資庫使曹確奏戶部每年合納當使  
三月九月兩限絹二十一萬四千一百匹錢五萬貫自  
大中八年已後至咸通四年積欠五十萬五千七百餘  
貫疋前使杜悰申奏起請咸通五年正月已後於諸道  
州府塲鹽院合送戶部八十文除陌錢內割十五文當  
使收管以填積欠續據戶部牒稱州府除陌錢有折色  
零碎請起咸通五年所合送延資庫錢絹逐年兩限須  
足其除陌十五文當司仍舊收管前使夏侯孜具事由

申奏且請依戶部論請期限其咸通五年錢絹戶部已送納自年至八年其錢絹依前不旋送納又積欠三十六萬五千五百七十貫文者伏以所置延資庫初以備邊為名至大中三年始改今號若財物不充則名額虛設當置制之時所令三司逐年分改減送當使收管元勅只有錢數但令本司減割送庫不定色目以此因循漸隳舊制年月既久積欠轉多既無計以徵收乃指色以取濟稍稱備邊名號得遵元勅指揮乃割戶部除

陌八十文內十五文收管及戶部請逐年送庫具票從  
今既積欠又多終慮不及期限臣今酌量請諸道州府  
場鹽院合送戶部錢絹內分配令勒留下合送納延資  
庫數目令本處別為綱運與戶部綱同送上都直納延  
資庫則戶部免有逋懸不至累年積欠從之

十月丙寅戶部侍郎判度支崔彥昭奏當司應收管江  
淮諸道州府咸通八年已前兩稅榷酒及度支米價并  
二十文除陌諸色屬省錢准舊例逐年商人投狀便換

自南蠻用兵已來置供軍使當司在諸州府場鹽錢猶有商人便換齋錢司便換文牒至本州府請領皆備諸州稱准供軍使指揮占留以此商人疑惑乃致當司支用不充乞下諸道州府場監院依限送納及給還商人不得託稱占留

昭宗乾寧四年同州節度使長春宮使韓建奏以京兆府於每年見徵賦內減四十萬貫充上供

梁太祖開平二年十一月兩浙節度使奏差使押茶貨

往青州廻變供軍布衫段送納

後唐明宗天成元年四月制曰先皇帝運關外之資糧  
供雒中之戎馬遂致百姓困弊不勝饋輓之勞今則須  
為制置令度支與總管司會定在京兵數據所供饋積  
貯京師其近畿糧儲可令諸軍就食其租庸使先將係  
省錢與人廻圖所供課利或爛茶弊物積年之後和本  
乾沒為弊最深宜令盡底收納以塞倖門

八月乙未汴州奏兵額數廣稅物不多切慮年終供饋

有闕支郡舊管漕州伏乞却歸當道從之

三年三月三司使奏河陽白波鞏縣見有軍儲百萬餘  
斛草二百七十萬束

長興二年四月太子賓客裴舉上言以京師牛馬多草  
價貴請畿內種禾者放地頭錢及甸服之內舟船所通  
汾河置場買草每至春夏即官中出賣

三年十二月乙亥三司使馮贊奏奉聖旨賜內外臣僚  
節料羊計支三千口帝曰不亦多乎范延光奏曰供御

厨及內史食羊每日二百口歲計七百萬餘口釀酒糯米二萬餘石帝聞奏歛容良久曰支費大過如何減省初莊宗同光時御廚日食羊二百口當時物論已為侈今羊數既同帝故駭心

四年二月癸丑帝御中興殿樞密使范延光曰緣邊屯戍兵士人馬支費月計極多若春夏之交便有霖雨山水湍險軍無興舉之理應緣邊兵馬請移於近裏州郡以便芻糧從之帝因問延光內外見管馬數對曰見兵

馬數管騎軍三萬五千帝撫髀歎曰朕從戎四十年太  
祖在太原時騎軍不過數千先皇與汴家二十年較戰  
自始至終馬數裁萬今有鐵馬三萬五千匹而不能使  
九州混一是吾養士卒練將帥之不至也吾老矣馬將  
奈何延光奏曰臣每思之國家養馬太多試計一騎士  
之費可贍步卒五人養三萬五千騎抵十五萬步卒既  
無所施虛耗國力臣恐一年不易帝曰誠如卿言肥騎  
士而瘠吾民何負哉八月賜侍衛親軍優給有差時月

內再有頒給自茲府藏無餘積矣

十一月辛巳朱弘昭馬贊曰臣等自蒙重委計度國力盈虛而支給常若不足者直以賞軍無等賈馬太多之弊也若不早為節限後將難濟宜嚴勅西北邊鎮守比後請禁止其來

閔帝應順元年正月洋州節度使孫漢韶上言於雒谷路造倉舍三月討鳳翔西京留守王思同上言度支支供軍錢一千萬末帝即位改元清泰太后太妃出宮中

衣服器用簪珥之屬令主者陳於帝庭以助勞軍也帝朝太后辭之不獲初三司計用賞軍錢五十萬及率士庶房課搜索質兼貢物及二十萬兩官知之故有斯助二年六月甲申以邊軍儲運不給詔北面總管以河東諸州民戶有多積粟菽者量事抄借以益軍儲乙酉詔鎮州輸絹五萬匹於北面總管府博糴軍儲七月甲午北面總管言邊軍乏芻糧其安重榮巡邊兵士欲移振武就軍食從之

晉高祖初即位改元天福赦制曰悉力為時罄財助國  
苟不推於恩命亦何示於賞酬自舉義以來應借率人  
戶及經抄括商旅資財錢物委所司明置文籍候平定  
之後當議給還

二年九月丁卯據度支奏應請假入覲省朝人皆是等  
第支賜茶藥自前委所司以諸進到者給今諸庫並無  
見在今後應有請假臣寮欲請權住支候有進到即依  
舊支賜從之

六年八月宣三司指揮鄴都澶相貝博五州配買修軍  
營材料一萬五千間仍差工匠人夫共九千人充役  
周廣順元年五月內鄴都王殷言奉宣以去年諸倉  
羨餘斛斗留一萬石本府公使餘係籍管從之

冊府元龜卷四百八十四